


प्रसार भारती
प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन

18.10 भुक्रवार

दिनांक 13.03.2026



प्रमुख समाचार –

1– प्रधानमंत्री नरेन्द्र मोदी ह आज असम के गुवाहाटी म होवइया कारीकरम म प्रधानमंत्री किसान सम्मान निधि योजना के बाईसवां किस्त जारी करीन।

2– प्रदेश म अवैध रूप ले अफीम के खेती के मामला आगू आय के बाद मुख्यमंत्री ह सबो जिला के कलेक्टर मन ल संभावित क्षेत्र के व्यापक सर्वे कराय के दीन निरदेस।

अउ

3– राष्ट्रीय विधिक सेवा प्राधिकरण नई दिल्ली के तत्वाधान म काली चौदह मार्च के राष्ट्रीय लोक अदालत के आयोजन करे जाही।

किसान सम्मान निधि

प्रधानमंत्री नरेन्द्र मोदी ह आज असम के गुवाहाटी म होवइया कारीकरम म प्रधानमंत्री किसान सम्मान निधि योजना के बाईसवां किस्त जारी करीन। योजना के तहत छत्तीसगढ़ के चौबीस लाख इकहत्तर हजार ले जादा किसान मनके खाता म चार सौ अंठावन करोड़ तिरासी लाख रुपिया के रासि अंतरित करे गीस।

समारोह ल संबोधित करत प्रधानमंत्री ह किहीन कि पीएम किसान सम्मान निधि योजना देस के छोटे किसान मन बर, सामाजिक सुरक्षा के एक माध्यम बन गेहे। ओमन किहीन कि एमएसपी, सस्ता ऋण, फसल बीमा के संगेसंग पीएम किसान सम्मान निधि योजना किसान मनके बहुत बड़का संबल बने हे।

ऐती, छत्तीसगढ़ के रईपुर स्थित इंदिरा गांधी कृषि विश्वविद्यालय परिसर म मुख्यमंत्री विष्णुदेव साय, कृषि मंत्री रामविचार नेताम के संग विधायक अउ जनप्रतिनिधि मन ह प्रधानमंत्री के भाषण के सजीव प्रसारण ल सुनीन। ए बेरा म मुख्यमंत्री ह किहीन कि प्रधानमंत्री किसान सम्मान निधि योजना के लाभ छत्तीसगढ़ के किसान मन ल घलो मिलत हे, जेखर बर छत्तीसगढ़ के किसान प्रधानमंत्री के आभारी हे।

मुख्यमंत्री-हरित शिखर सम्मेलन

मुख्यमंत्री विष्णुदेव साय आज रईपुर के पंडित रविशंकर शुक्ल विश्वविद्यालय ऑडिटोरियम म आयोजित दूसरइया छत्तीसगढ़ हरित शिखर सम्मेलन म सामिल होइन। समारोह ल संबोधित करत हुए मुख्यमंत्री ह किहीन कि छत्तीसगढ़ ग्रीन इकोनॉमी के क्षेत्र म अपन भूमिका सशक्त बनावत हे अउ देस म ग्रीन इकोनॉमी के क्षेत्र म नवा पहिचान बनत हे। ए बेरा म मुख्यमंत्री ह सम्मेलन म प्रस्तुत शोध के संकलन उपर आधारित पुस्तक "एब्सट्रेक्ट" सम्मेलन के प्रमुख चर्चा उपर आधारित "हाइलाइट्स ऑफ द समिट" के संग जनजातीय कहानी अउ परंपरा उपर आधारित पुस्तक "कथा कंथली" के विमोचन करीन।

केंद्र-प्राकृतिक आपदा राशि

केंद्र सरकार ह प्राकृतिक आपदा ले प्रभावित राज्य मनके मदद बर एक जरूरी निर्णय लेहे। ए निर्णय के तहत छत्तीसगढ़ ल पंद्रह करोड़ सात लाख रुपिया के सहायता प्रदान करे जाही। केंद्रीय गृह मंत्री अमित शाह के अध्यक्षता म होय उच्च स्तरीय समिति ह बछर दू हजार पच्चीस के दउरान आपदा ले प्रभावित राज्य मन बर लगभग एक हजार नौ सौ तेरह करोड़ रुपिया के अतिरिक्त केंद्रीय सहायता ल मंजूरी देहे। केंद्र सरकार डहार ले

ए सहायता राष्ट्रीय आपदा प्रतिक्रिया कोष ले जारी करे जाही। मुख्यमंत्री विष्णुदेव साय ह प्राकृतिक आपदा ले निपटे म केंद्र के ए अतिरिक्त सहयोग बर केंद्रीय गृहमंत्री के आभार जतइन।

मुख्यमंत्री-निर्देश

प्रदेस म अवैध रूप ले अफीम के खेती के मामला आगू आय के बाद मुख्यमंत्री विष्णुदेव साय ह सबो जिला के कलेक्टर मन ल अपन-अपन जिला म संभावित क्षेत्र के व्यापक सर्वे कराय के निरदेस देहे।

मुख्यमंत्री ह कलेक्टर मन ल निर्देसित करे हे कि पंद्रह दिन के अंदर प्रमाण पत्र के संग विस्तृत जांच रिपोर्ट शासन ल प्रस्तुत करना सुनिश्चित करय। मुख्यमंत्री ह किहीन कि राज्य म अवैध मादक पदार्थ के उत्पादन अउ कारोबार के प्रति सरकार जीरो टॉलरेंस के नीति उपर काम करत हे।

आयुक्त भू-अभिलेख डहार ले सबो जिला कलेक्टर मन ल सर्वे करके जांच रिपोर्ट अउ ओखर जिला म अफीम के खेती नइ करे जाय संबंधी प्रमाण पत्र उपलब्ध कराय के संबंध म एक पत्र जारी करे गेहे।

अफीम खेती-आरोपी गिरफ्तार

बलरामपुर जिला के करौधा थाना इलाका के तुरीपानी गांव म अफीम के खेती के मामला म पुलिस ह दू लोगन मन ल गिरफ्तार करे हे। इंखर तीर ले दू करोड़ रुपिया के अफीम जब्त करे गेहे।

जानब के मुताबिक बलरामपुर जिला म दू अलग-अलग जघा म अफीम के खेती के मामला पाछू दिन आगू आय रिहीस, जेखर बाद पुलिस ह कुसमी थाना क्षेत्र के त्रिपुरी गांव म अफीम के खेती के मामला म सात लोगन मन ल गिरफ्तार करे रिहीन।

विधानसभा समाचार-01

राज्य विधानसभा बजट सत्र के दउरान आज सदन म धियान आकर्षण सूचना के जरिया ले विपक्षी सदस्य मन ह नवा शिक्षा नीति के पालन ल लेके स्कूल शिक्षा मंत्री के धियान आकर्षित कराइन। कांग्रेस सदस्य

राघवेंद्र सिंह ह आरोप लगइन कि राज्य म नवा शिक्षा नीति के पालन सही ढंग ले नइ होवत हे। जवाब म स्कूल शिक्षा मंत्री गजेन्द्र यादव ह बतइन कि नवा शिक्षा नीति म बाईस छात्र म एक शिक्षक के बेवस्था के प्रावधान हे। छत्तीसगढ़ म युक्तियुक्तकरण के तहत आज औसत उन्नीस छात्र म एक शिक्षक हे। फेर मंत्री ह स्वीकार करीन कि वर्तमान म सबो स्कूल म नवा शिक्षा नीति पूरा तरीका ले लागू नइ होय पाय हे।

विधानसभा समाचार-02

इही बीच, विधानसभा म आज राजस्व मंत्री टंकराम वर्मा अउ स्कूल शिक्षा मंत्री गजेन्द्र यादव के विभाग के अनुदान मांग के चर्चा के बाद पारित कर दे गीस।

एखर पहिली, कांग्रेस विधायक दलेश्वर साहू ह मंत्री टंकराम वर्मा के विभाग के अनुदान मांग उपर चर्चा के सुरुआत करीन। उच्च शिक्षा विभाग अउ राजस्व विभाग के सचिव अउ वरिष्ठ अधिकारी मनके सदन के पदाधिकारी गैलरी म उपस्थित नइ होय म कांग्रेस विधायक ह आपत्ति जतइन अउ चर्चा म हिस्सा न लेत बात कहत हुए सदन ले बहिर्गमन कर दीन। बाद म सचिव मनके पदाधिकारी गैलरी म पहुंचे म कांग्रेस विधायक सदन के कार्रवाई म सामिल होही।

समाधान योजना

मुख्यमंत्री विष्णुदेव साय ह काली रईपुर के पंडित जवाहर लाल नेहरू स्मृति चिकित्सालय स्थित सभागार म मुख्यमंत्री बिजली बिल भुगतान समाधान योजना के सुभारंभ करीन।

ए बेरा म मुख्यमंत्री ह किहीन कि समाधान योजना के जरिया ले लंबा समय ले बिजली बिल के भुगतान नइ कर पाने वाला प्रदेश के निम्न अउ मध्यम आय वर्ग अउ कृषि उपभोक्ता मन ल राहत देके पहल करे गेहे। योजना के तहत प्रदेश के अटठाईस लाख बयालिस हजार उपभोक्ता मन ल कुल सात सौ संतावन करोड़ रुपिया के राहत दे जाही। मुख्यमंत्री ह किहीन हे कि सिविर लगाके अउ व्यापक प्रचार-प्रसार के जरिया ले जादा ले जादा उपभोक्ता मन ल समाधान योजना ले जोड़े जाही।

युवा संगम-नोडल संस्थान

केंद्रीय शिक्षा मंत्रालय ह छत्तीसगढ़ के भिलाई स्थित भारतीय प्रौद्योगिकी संस्थान ल 'युवा संगम के पांचवां चरण के तहत नोडल संस्थान नामित करे हे। ए राष्ट्रीय युवा आदान-प्रदान पहल शिक्षा मंत्रालय के उच्च शिक्षा विभाग डहार ले "एक भारत श्रेष्ठ भारत" अभियान के अंतर्गत संचालित करे जात हे। एखर उद्देश्य देस के आने-आने राज्य के युवा मनके बीच सांस्कृतिक, सैक्षिक अउ सामाजिक एकीकरण ल सृदृढ़ करना हे।

कारीकरम के ए चरण म छत्तीसगढ़ ल राष्ट्रीय राजधानी दिल्ली के संग जोड़े गेहे। एखर तहत छत्तीसगढ़ ले चयनित युवा प्रतिभागी पांच ले सात दिन के सैक्षिक अउ सांस्कृतिक अध्ययन यात्रा बर दिल्ली जाही, फेर दिल्ली ले चयनित प्रतिभागी छत्तीसगढ़ के दउरा करही।

कारीकरम म भाग लेबर इच्छुक अभ्यर्थी "एक भारत श्रेष्ठ भारत" पोर्टल के जरिया ले अट्टारा मार्च तक ऑनलाइन पंजीकरण कर सकत हे।

राष्ट्रीय लोक अदालत

राष्ट्रीय विधिक सेवा प्राधिकरण नई दिल्ली के तत्वाधान म काली चौदह मार्च के राष्ट्रीय लोक अदालत के आयोजन करे जाही। ए कड़ी म राज्य विधिक सेवा प्राधिकरण बिलासपुर डहार ले प्रदेस के सबो जिला अउ व्यवहार न्यायालय म घलो लोक अदालत आयोजित करे जाही। एमा मोटर दुर्घटना दावा ले संबंधित प्रकरण, चेक बाउंस, जल कर, संपत्ति कर, राजस्व संबंधी प्रकरण, ट्रैफिक चालान, भाड़ा नियंत्रण अउ आबकारी ले संबंधित मामला के निराकरण करे जाही। अइसने बैंक विद्युत संबंधी प्री-लिटिगेशन प्रकरण, राजस्व न्यायालय खंडपीठ म खातेदार मनके बीच आपसी बंटवारा अउ वारिस के मध्य बंटवारा के निराकरण करे जाही।

मौसम

मौसम विभाग ह प्रदेस म काली चौदह मार्च के दक्षिण बस्तर म एक-दू जघा म हल्का बरसा होय के संभावना जताय हे, जेखर ले तापमान म गिरावट दर्ज करे जा सकत हे। उहें, बांचे हिस्सा म मौसम सुष्क रइही अउ अधिकतम तापमान म कोनो बिसेस परिवर्तन होय के संभावना नइ हे।

